

Tgi vegn papa?

Elegian ils cardinals puspè in European?

■ (gsc) «Nuntio vobis gaudium magnum: Habemus Papam!» Fitg probablamain avant Pasca vegn cardinal Jean-Louis Tauran a proclamar questa novitad. L'elecziun dal papa na riguarda betg mo la milliarda umans che sa numnan sezs catolics. «Ins dat adatg dal papa areguard sia capacitat e voluntad da dialogar cun tschellas religiuns e, per part, era da sa drizzar als sceptics. Quai che la baselgia catolica pregia pon ins udir er ordaifer las cuminanzas carentas, saja quai davart l'etica sociala, l'immigraziun u l'ecologia» («Le Monde», Paris, 28 da favrer 2013, p. III). Uss han ils cardinals electurs il pled. In d'els, il Piemuntais Tarcisio Bertone (*1934), duai convocar il conclave che vegn a tscherner il papa nov, fitg probablamain in da ses commembers. Lur decan, il Lumbard Giovanni Battista Re (*1934), pudess celebrar la messa d'avertura. Pli ras gasettas han publictà glistas da «papabili», t.a. «La Liberté» (Friburg) dals 27 da favrer, lura «Le Monde» (supplement special) e la «NZZ» dals 28. I suonda ina sintesa geopolitica da quels artitgels.

La forza da l'America latina

La p. VIII da «Le Monde» mussa graficas ordvart infurmativas. L'onn 2010 vivevan 39% da la populaziun catolica

mundiala en l'America latina cun las Antillas, 24% en Europa, 16% en l'Africa a sid da la Sahara, 12% en Asia ed Oceania, 8% en l'America dal nord. Areguard ils stadis era la Brasilia l'emprim pajais catolic cun 126 milliuns, pia 65% da sia populaziun; il segund era il México cun 96,4 milliuns (85%); il plaz 3 da quella rangaziun occupavan, bunamain «ex aequo», las Filippinas (75,6 milliuns u 81%) ed ils Stadis unids (75,4 milliuns u 24%). L'emprim pajais europeic, l'Italia (49,2 u 81,2%), occupava pir il plaz 5, e l'emprim pajais african, il Congo-Kinshasa (31,2 milliuns u 47,3%), il plaz 9, suenter Frantscha, Pologna e Spagna. L'emprim continent areguard il catolicissem è cleramain l'America latina, tant pli che var $\frac{2}{3}$ dals catolics dals Stadis unids èn «Hispanics» (v. La Quotidiana dals 12 da favrer 2013). «Le Monde» numna dus «papabili» brasilians. Odilo Scherer (*1949), archuvestg da la metropola economica São Paulo, deriva da Tudestgs da Saarland emigrads al stadi brasilian da Rio Grande do Sul. João Braz de Aviz (*1947), naschè en quel da Santa Caterina, è schef da la Congregaziun vaticana dals urdens religiuns. «La Liberté» menziuna anc dus «papabili» da lingua spagnola, domadus fitg sensibels a l'ingiustia sociala: Oscar Andrés

Rodríguez Maradiaga (*1942), archuvestg da Tegucigalpa (Honduras), parsura da la Caritas Internationalis, e Leonardo Sandri (*1943, Buenos Aires), da derivanza taliana, schef da la Congregaziun vaticana per las baselgias orientalas.

Africans ed Asiats

Ma er en l'Africa dal vest e sin inslas da l'Asia dal sidost han ils experts «vaticanologs» scuvert cardinals abels da vegnir papas. «La Liberté» menziuna trais Africans: «Il website african d'infurmaziun <koaci.com> resguarda Peter Turkson Appiah (64, da Ghana), parsura dal Cussegl papal 'Giustia e pasch', sco il pli popular. Auters nums circuleschan, sco quel dal Nigerian John Onaiyekan (68), premi Pax Christi internaziunal 2012 per ses engaschi en il dialog tranter cristians e muslims, ubain Robert Sarah (67, [da Guinea]), dapi 2010 parsura dal Cussegl papal 'Cor unum', responsabel da las activitads caritativas.» Era la «NZZ» lauda oravant tut cardinal Turkson «per sia furma da pastoraziun, cumbattiva e misericordiaivla enina, en in context da fom e da guerras.» Ma «Le Monde» commentescha: «Blers observaturs manegian ch'il conclave na saja betg pront per eleger in 'papa nair'. Qua duess la baselgia catolica empren-

der dals Stadis unids cun lur president. «Le Monde» numna plinavant dus «papabili» asiatics, domadus archuvestgs: Albert Malcolm Ranjith Patabandige (*1947, Colombo) e Luis Antonio Tagle (*1957, Manila). Tagle è l'unic che deriva d'in pajais cun maiortad catolica; tut tschels èn naschids e creschids si en contact cun autras religiuns pli fermas, il pli savens l'islam, uschiglio il bu-dissem.

Figls da l'Occident

Ma 61 dals 117 cardinals electurs èn Europeans e 28 èn Talians. La «NZZ» scriva: «Gist ils Talians, cun lur dispitas aifer la curia papala, (...) han impedì bleras iniziativas da papa Benedetg (...). Quai duess limitar cleramain la quaida da tschels cardinals dal conclave d'eleger in papa talian, ch'i saja il litterat cultivà Gianfranco Ravasi (70, [Lumbard]) u Angelo Scola (72), archuvestg da Milaun, che provegn dal moviment da basa 'Comunione e liberazione'.» Era «Le Monde» manegia che lur colliaziun cun il «caos Italia» (v. La Quotidiana dals 1. da mars) possia la fin finala impedir lur elecziun, perquai che tschels cardinals «giavischassan da vegnir libers dal gieu locals da pussanza.» Tant pli ch'auters dus «papabili» europeics statan anc a disposiziun. Na, nagin Svizzer; la guardia papala represchenta tuttavia noss pajais, e quai schizunt cun ses «dc» da Nadal 2012, sunà da sis gardists cumpagnads da l'arpa paraguaiana d'ina Svizra. Ils dus archuvestgs «papabili» da l'Europa centrala èn Péter Erdő (*1952, Esztergom-Budapest), parsura dal Cussegl da conferenzas episcopolas europeicas, e Christoph Schönborn (*1945, Vienna). Schönborn, naschè a Skalken/Skalka en Boemia, è stà cun otg mais in dals passa trais milliuns «Sudetendeutsche» sbandids da lur patria suenter la Segunda guerra mundiala. La glista dals «papabili» na fiss cumpletta senza trais cardinals da l'America dal nord: Seán Patrick O'Malley (*1944), chaputschin ed archuvestg da Boston, Timothy Dolan (*1950), archuvestg da New York, e cunzunt il Canadais francofon poliglot Marc Ouellet (*1944), anteriur rectur da seminaris da spirituals en Colombia (Manizales) e Canada (Montréal ed Edmonton). La «NZZ» concluda: «Vegn il proxim papa puspè marcà da las experienzas e temas dal mund vegl? Cun in papa ord l'ina da las duas Americas, d'Africa u d'Asia (...) pudess il sontg Spiert metter in accent nov (...), en mintga cas cun in ristg, ma era cun ina speranza nova.»

Wer wird der nächste Papst?

Als mögliche Nachfolger Benedikts XVI. werden derzeit u.a. diese Kardinäle genannt:

